

# Reglur Akrahrepps um skólaakstur í grunnskóla

## 1.gr.

### Gildissvið og orðskýringar

Um skólaakstur í Akrahreppi gilda reglur um skólaakstur í grunnskóla, nr. 656/2009. Reglur þessar taka til skipulags skólaaksturs milli heimilis og grunnskóla. Með skólaakstri er í reglum þessum átt við akstur á milli heimilis og grunnskóla innan skólahverfis. Heimili í reglum þessum merkir skráð lögheimili nemanda.

## 2.gr.

### Ábyrgð

Akrahreppur ber ábyrgð á öryggi og velferð nemenda í skólaakstri og að uppfylltar séu kröfur laga og reglugerða um umferðaröryggi.

## 3.gr.

### Um skipulag skólaaksturs

Gerðir eru samningar við verktaka um ákveðnar leiðir. Við vissar aðstæður er heimilt að semja við forráðamenn nemenda um þátttöku þeirra í skólaakstri gegn greiðslu. Þetta á fyrst og fremst við þegar heimili nemanda er langt frá leið skólalíls og foreldrar geta keyrt barnið í veg fyrir skólalílinn.

Skipulag skólaaksturs skal taka mið af kennsluskipan, fjölda nemenda, öryggi þeirra og vegalengd milli skóla og heimilis. Daglegum skólaakstri ber að haga með þeim hætti að nemendum sé ekið heim sem fyrst eftir að skóladegi lýkur. Eftir því sem við á skulu foreldrar/forsjarmenn fylgja börnum sínum að skólalíli og taka á móti þeim eftir skóla.

Skólastjóri semur sérstaklega um aukaakstur, s.s. vegna félagsstarfa og vettvangsferða, og hefur heimild til að leita hagstæðasta tilboðs hverju sinni hjá þar til bærum aðilum.

Ekki er heimilt að taka aðra farþega í bílinn en grunnskólanemendur nema með sérstöku samþykki fræðslustjóra og/eða fræðslunefndar.

## 4.gr.

### Akstursáætlun

Daglegur skólaakstur er í samræmi við samninga um skólaakstur sem í gildi eru hverju sinni. Skólaaksturinn er skipulagður samkvæmt skólaakstursáætlun sem skólastjóri vinnur í samráði við fræðslustjóra fyrir hvert skólaár í samræmi við nemendafjölda og kennsluskipan. Skólastjóri leggur fram áætlun um skólaakstur við upphaf hvers skólaárs þar sem fram koma upplýsingar um fjölda farþega, akstursleiðir, tímasetningar og fjölda akstursdaga á skólaárinu. Skipulagi skólaaksturs verður að öllu jöfnu ekki breytt innan skólaárs nema til komi fjölgun/fækkun grunnskólabarna sem nýta skólaakstur.

Áætlunina skal kynna skólaráði grunnskólans sbr. 8 .gr. laga nr. 91/2008 og skal hún vera íbúum sveitarfélagsins aðgengileg á heimasíðu Akrahrepps og viðkomandi grunnskóla.

## 5.gr.

### Öryggi farþega

Bifreiðastjóri skal sjá til þess að nemendur séu í öryggisbeltum og skal ekki leggja af stað fyrr en öll öryggisatriði hafa verið uppfyllt.

Bifreiðastjóri leggur mat á hvort aðstæður séu með þeim hætti, t.d. vegna veðráttu eða ófærðar, að breyta þurfi út frá fyrirliggjandi áætlun um daglegan skólaakstur. Tilkynna ber skólastjóra um slíkar breytingar án tafar.

Skólareglur, skv. 30. gr. laga nr. 91/2008 um grunnskóla, eiga við um framkomu og háttsemi nemenda í skólaakstri. Fara skal með brot á skólareglum skv. 14. gr. sömu laga. Skólastjóri metur hvort þörf sé á gæslumanni í skólabifreið með hliðsjón af öryggi, fjölda, aldri nemenda og samsetningu nemendahópsins sem ferðast með bifreiðinni, vegalengd og öðrum aðstæðum.

Bifreiðastjóra ber að sýna sérstaka aðgát áður en nemendum er hleypt út úr skólabifreið og skal bifreið ávallt ekið upp í heimreið. Í þeim tilvikum þar sem bifreiðastjóri getur ekki ekið að heimreið og börn þurfa að fara yfir veg, útveggar sveitarfélagið þeim börnum endurskinsvesti eða annan búnað sem hægt er að nota við slíkar aðstæður. Bifreiðastjóri getur tekið ákvörðun um að aka ekki ef aðstæður eru með þeim hætti, t.d. vegna veðráttu eða ófærðar. Ekki skal skilja börnin eftir ein í vondum veðrum.

#### **6.gr.**

##### **Fatlaðir nemendur**

Nemendur sem sökum fötlunar geta ekki nýtt sér hefðbundinn skólaakstur eiga rétt á ferðaþjónustu til og frá skóla, skv. 35. gr. laga nr. 59/1992 um málefni fatlaðra, þeim að kostnaðarlausu.

#### **7.gr.**

##### **Öryggi og búnaður skólabifreiða**

Bifreið sem notuð er í skólaakstri skal uppfylla skilyrði til aksturs með grunnskólabörn samkvæmt lögum þar um, reglugerðum og settum reglum um öryggi farþega, gerð, búnað og notkun öryggis- og verndarbúnaðar og merkingu bifreiða sem í gildi eru á hverjum tíma.

Auk þess skal:

- hitastig bifreiðar í upphafi ferðar vera viðunandi
- farsími og handfrjálts búnaður skal vera í bifreiðinni
- bifreið skal vera merkt skólaakstri að framan og aftan
- hjólbarðar verða að standast kröfur um mynstursdýpt

#### **8.gr.**

##### **Bifreiðastjóri skólabifreiða**

Sveitarfélagið Akrahreppur semur við verktaka um framkvæmd skólaaksturs. Skólastjóri viðkomandi skóla er yfirmaður bifreiðastjóra að því leyti sem það varðar daglegt fyrirkomulag aksturs og umsjón nemenda í skólaakstri.

Bifreiðastjóri skólabifreiða skal hafa aukin ökuréttindi og hafa sótt skyndihjálparnámskeið og önnur þau námskeið sem sérstaklega eru ætluð bifreiðastjórum fólksflutningabíla. Bifreiðastjóri skal skila inn heilsufarsvottorði í upphafi hvers skólaárs þar sem fram koma upplýsingar um aðstæður sem haft geta áhrif á aksturshæfni bifreiðastjóra. Bifreiðastjóra er með öllu óheimilt að nota farsíma meðan á akstri stendur.

Skylt er að upplýsa skólastjóra, með hæfilegum fyrirvara, ef skipt er um skólabílstjóra. Vegna skyndilegra forfalla og afleysinga bifreiðastjóra ber að tilkynna þau til skólastjóra eins fljótt og auðið er.

Óheimilt er að ráða bifreiðastjóra til skólaaksturs eða gæslumann, sbr. ákvæði 5. greinar, sem hlotið hefur refsisdóm fyrir brot á ákvæðum XXII. kafla almennra hegningarlaga. Við gerð samnings um akstur skal liggja fyrir sakavottorð eða heimild skólastjóra eða fræðslustjóra til þess að afla upplýsinga úr sakaskrá, sbr. 3. mgr. 11 .gr. laga nr. 91/2008.

Bifreiðastjóri skal kappkosta að gera hverja ferð sem þægilegasta fyrir farþega sína og halda áætlun eins og kostur er.

Komi upp vandamál í skólabíl, svo sem vanlíðan, einelti eða stríðni, eða verði bílstjóri var við að eitthvert barnanna eigi í erfiðleikum ber honum að ræða það við skólastjóra og/eða foreldra. Ákvæði um þagnarskyldu starfsfólks skóla og tilkynningarskyldu til barnaverndaryfirvalda taka til bifreiðastjóra skólabifreiðar þó hann sé ekki starfsmaður sveitarfélagsins.

#### **9.gr.**

##### **Um meðferð ágreiningsmála**

Telji forráðamaður nemanda einhverju áfátt í fyrirkomulagi skólaaksturs eða að á rétti barns sé brotið getur hann leitað leiðréttingar hjá skólastjóra eða fræðslunefnd.

Reglur þessar voru samþykktar í sveitarstjórn Akrahrepps 12. júlí 2018.

Að öðru leyti vísast í reglur Mennta- og menningarmálaráðuneytis um skólaakstur nr. 656/2009.